

„ბუნებრივი და ტექნოგენური ხასიათის საგანგებო სიტუაციებისაგან მოსახლეობისა და ტერიტორიის დაცვის შესახებ“ საქართველოს კანონის იმ მუხლების დანართი, რომლებშიც უნდა განხორციელდეს ცვლილებები

## თავი II

საქართველოს პარლამენტის, საქართველოს პრეზიდენტის, საქართველოს მთავრობის, აფხაზეთისა და აჭარის ავტონომიური რესპუბლიკების სახელმწიფო ხელისუფლების, სახელმწიფო რწმუნებულის – გუბერნატორისა და ადგილობრივი თვითმმართველობის ორგანოთა უფლებამოსილებები საგანგებო სიტუაციებისაგან მოსახლეობისა და ტერიტორიის დაცვის სფეროში

მუხლი 10. საქართველოს პრეზიდენტის უფლებამოსილება

საქართველოს პრეზიდენტი:

- ა) ახორციელებს საკანონმდებლო ინიციატივას საგანგებო სიტუაციებისაგან მოსახლეობისა და ტერიტორიის დაცვის სფეროში;
- ბ) გამოსცემს შესაბამის სამართლებრივ აქტებს საგანგებო სიტუაციებისაგან მოსახლეობისა და ტერიტორიის დაცვის სფეროში;
- გ) ამტკიცებს ეროვნული რეაგირების გეგმას და სამოქალაქო თავდაცვის გეგმებს.

მუხლი 11. საქართველოს მთავრობის უფლებამოსილება

საქართველოს მთავრობა:

- ა) აკონტროლებს სამინისტროთა და სახელმწიფო საქვეუწყებო დაწესებულებათა საქმიანობას საგანგებო სიტუაციებისაგან მოსახლეობისა და ტერიტორიის დაცვის სფეროში;
- ბ) ახორციელებს საკანონმდებლო ინიციატივას და შეიმუშავებს სამთავრობო პროგრამას საგანგებო სიტუაციებისაგან მოსახლეობისა და ტერიტორიის დაცვის სფეროში;
- გ) უზრუნველყოფს ერთიანი სახელმწიფო პოლიტიკის განხორციელებას საგანგებო სიტუაციებისაგან მოსახლეობისა და ტერიტორიის დაცვის სფეროში;
- დ) გამოსცემს შესაბამის სამართლებრივ აქტებს საგანგებო სიტუაციებისაგან მოსახლეობისა და ტერიტორიის დაცვის სფეროში;
- ე) საგანგებო სიტუაციის დროს ქვეყნის თავდაცვისა და საზოგადოებრივი უსაფრთხოების უზრუნველყოფის მიზნით იღებს აუცილებელ ზომებს;
- ვ) ორგანიზებას უწევს ქალაქებისა და ეკონომიკის ობიექტების სამოქალაქო თავდაცვის თანახმად პოტენციური საშიშროების ხარისხის, ადმინისტრაციულ-სტრატეგიული და სასიცოცხლო მნიშვნელობების კატეგორიებად დაყოფას;
- ზ) ქმნის საგანგებო სიტუაციების მართვის სამთავრობო კომისიას, რომელიც არის ერთიანი სისტემის კოორდინატორი;
- თ) ამტკიცებს საგანგებო სიტუაციების მართვის სამთავრობო კომისიის დებულებას.

მუხლი 27. საქართველოს მთავრობის მიერ ამ კანონის  
რეგულირების სფეროში გამოსაცემი ნორმატიული  
აქტები (31.07.2009 N 1566)

1. საქართველოს მთავრობამ ამ კანონის ამოქმედებიდან 6 თვის ვადაში  
გამოსცეს დადგენილებები:

ა) საგანგებო სიტუაციების კლასიფიკაციის განსაზღვრის წესის შესახებ  
დებულების დამტკიცების თაობაზე;

ბ) საგანგებო სიტუაციების მართვის სამთავრობო კომისიის დებულების  
დამტკიცების შესახებ.

2. საქართველოს მთავრობამ 2010 წლის 1 იანვრამდე გამოსცეს  
დადგენილებები:

ა) საგანგებო სიტუაციებზე რეაგირების ძალების წესდების დამტკიცების  
შესახებ;

ბ) უსაფრთხოების დეკლარაციის წარდგენის წესის შესახებ ინსტრუქციის  
დამტკიცების თაობაზე.